


14
[pièce 16]
a


Robert plaidant au Conseil pour M^{re} Jean de Hauard Prieur du Prieuré d'Aunay, au Diocèse de Paris, demandeur & complaignant pour raison du possessoire dudit Prieuré, suivant la Requête par luy présentée au Conseil le 12 Mars 1643. demandeur aussi aux fins d'une Requête du 29. Iuillet,

Contre Messire Armand de Bourbon Prince de Conty, Abbé, Chef & general Administrateur de l'Ordre de Clugny, deffendeur & opposant à ladite complainte, demandeur en Requête de cassation, & encores appellant comme d'abus. Madame la Duchesse d'Esguillon, & le sieur du Pont de Courlay, heritiers de Monsieur le Cardinal de Richelieu, deffendeurs. Et M^{re} Jean de Flacourt aussi complaignant pour raison du mesme Prieuré, demandeur:



Dit que le Prieuré d'Aunay contentieux entre les parties, a esté fondé pour estre deservy par vn Prieur & deux Religieux de la maison de Clugny, & est vne fondation particulieté, & vn don fait à l'Abbaye. Les Prieurez de Clugny n'estans pas comme ceux des autres maisons religieuses composés pour la pluspart des fonds & domaines des Monasteres: Mesmes comme on sçait que les Prieurez originairement estoient des Mestairies éloignées des Abbayes, où l'Abbé enuoyoit des Religieux pour les faire valoir, & en administrer le reuenu, & s'appelloient au commencement *Obedientia*, au Chapitre 2. *De statu Monachorum*. Ces Religieux y estans enuoyez par obediencia: Et ces mesmes Religieux depuis ne voulans plus retourner à leur Conuent, & faisans bastir des Chappelles en ces lieux-là, dont ils retenoient aussi le reuenu, il s'en est formé des titres particuliers de Benefices, & des Prieurez simples dependans des Abbayes, lesquels comme on void, estoient du domaine d'icelles; & c'est pourquoy il y a plus de raison de les conseruer en leurs titres.

Les Prieurez de l'Ordre de Clugny ne sont point de cette qualité, pour la plus grande partie ne procedans point de l'ancien domaine & reuenu de l'Abbaye; ce sont quasi toutes dotations particulieres, desquelles autresfois l'on a fait don à la maison: C'est ce qui est déclaré par le Roy Louys le Gros en ce beau titre



expédié en faueur de l'Abbaye de Clugny en l'an 1119. *Monasterium Cluniacense nobilius membrum regni nostri, sub nostra tuitione ac defensione recipimus, prioratus etiam ipsos Abbati & Monasterio Cluniacensi donatos, promittimus manuteneri, defendere & custodire.* La pluspart de ces Prieurez estans donations particulieres de personnes, lesquelles portées de deuotion, faisoient bastir des Eglises & assignoient des reuenus pour y receuoir des Religieux de l'Abbaye de Clugny. Tel estoit le Prieuré d'Aunay esloigné de l'Abbaye, qui a tousiours esté vn titre de Benefice formé, esloigné, vn domaine separé de l'Abbaye, où il y auoit vn Prieur & deux Religieux.

Et est ce Prieuré demeuré en cet estat jusques à vne Bulle d'Vnion du Pape Clement VII. à Auignon, Bulle par consequent obtenüe pendant le Schisme qui estoit en l'Eglise, & de laquelle l'Autheur est mis au nombre des Anti-Papes.

Il est vray qu'on pretend que cette Bulle doit estre attribuée au Pape Clement VI. afin de faire remonter encore l'Vnion plus haut, la rendre plus ancienne de quarante années ou enuiron, & mesmes pour l'exempter par ce moyen du Decret du Concile de Constance, qui reuoque les Vnions faites sans cause legitime, depuis Gregoire XI. seulement, lequel n'estoit qu'apres Clement VI.

Et cette coniecture est fondée sur vne lettre qui est vn P tranché, qui se void à la fin de la Bulle, & qu'on veut signifier *Petrus*, & quelques mots qui suivent enabregé, qu'on pretend denoter *Abbas secundus*; Et pource que du temps de Clement VI. il y auoit vn Pierre second Abbé de Clugny, l'on argumente que la Bulle est de Clement VI.

Mais on trouue par la datte de la Bulle qu'elle ne peut estre attribuée à Pierre second, ny par consequent à Clement VI. pource que le Pape Clement VI. fut esleu en Auignon le 5. May 1342. & la Bulle est dattée du 25. Ianuier *Anno secundo Pontificatus*. Tellement que la Bulle ne peut estre que de l'année 1343. Car Pierre second fut esleu Abbé en 1322. *cæpit regere anno 1322.* & ne fut Abbé que vingt ans seulement, & *abdicaui se anno 1342.* lors qu'il fut fait Euesque de Valence: de sorte qu'en l'an 1343. qui est le temps de la Bulle Pierre second n'estoit plus Abbé.

Et c'est ce Pierre second qui acquist l'Hostel de Clugny en cette ville, qu'on appelloit l'Hostel des Thermes, & le donna à l'Abbaye: Qui fonda le Prieuré de Paroy, & l'acquist au Monastere, receut dans son Abbaye le Roy Philippes de Valois, la Reine, ses enfans & toute sa Cour, & les defraya huit iours entiers. Qui est vn tesmoignage que la Pittacerie de l'Abbaye ne manquoit de rien: Et neantmoins on voudroit faire croire qu'il y auroit fait vnir vn Prieuré qu'on disoit lors estre de deux cens liures seulement, par la Bulle, & dont on payoit soixante & quinze liures au Monastere; si bien que c'estoit enuiron six vingts cinq liures de rente qu'il adjoustoit au reuenue de la Pittancerie.

Mais au temps mesme qu'il faudroit que cette Bulle eust esté obtenüe, l'on void dans la Chronique de l'Ordre qu'il arriua vne si grande mortalité & vne peste si furieuse dans la prouince, & particulièrement dans l'Abbaye de Clugny, que de deux cens soixante Religieux qu'il y auoit lors, il n'y en demeura pas dix: Voicy les termes de l'histoire de l'Ordre, *Ante magnam mortalitatem, quæ incæpit anno Domini 1343. & durauit per tres annos, erant ibi. 260. religiosi qui ad 10. fuerunt reducti.* Or n'eust-il pas esté absurde de dire que le Pittancier n'eust pas eu de quoy fournir la prouision des Religieux apres cela?

Mais vne autre coniecture qui fait croire que cette Bulle est de Clement VII.

ainsi que le Concordat fait avec Monsieur le Cardinal de Richelieu le porte expressément, & la datte de l'an 1382. C'est que le prétexte de la Bulle est fondé sur le changement des monnoyes, *quod officio Pittentiarj Monasterij vestri non suppetant facultates ad supportanda onera, praesertim tempore debilis moneta*. Or il se trouue vn Edit pour la reduction & diminution des monnoyes, du Roy Charles V. qui est au temps que Clement VII. estoit à Auignon, & vn traité qui fut fait en cetemps-là d'un Oresmas Euesque de Lisieux, qui fut Precepteur du Roy Charles V. de *mutatione monetarum*, où il y a vn Chapitre, *An lucrum quod principi accidit ad mutationem monetarum sit licitum*. Aussi le demandeur fera voir par vne premiere collation quia esté faite de la Bulle d'Vnion pardeuant deux Notaires Apostoliques le 22. Octobre 1595. qu'il n'y a autre chose à la fin de la Bulle, sinon *pro Abbate Cluniacensi principe pallacij*: Et que quād Claude de Guise a fait depuis collationner la mesme Bulle au Greffe de la Cour l'onzième Janu. 1596. il y auoit aussi à la fin *pro Abbate Cluniacensi principe pallacij*: & que de ces mots qui y sont encores visibles & apparents, l'on a fait depuis en changeant quelques lettres *Petrus Abbas secundus*, afin de rejeter le temps de la Bulle sous Clement VI. d'Auignon, sous lequel estoit *Petrus Abbas secundus*: mais l'addition y est toute claire, & le changement des lettres visible & oculaire.

Cette Bulle donc est de Clement VII. à Auignon, pour lequel il est vray que la France se declara & fauorisa son party. Et ce qu'il a fait neantmoins contre les formes legitimes & Canoniques, ne fut iamais pour cela plus valable!

Ce Pape qui ne regnoit quasi que par precaire à Auignon, donnoit des graces expectatiues, dont il y en a qui le font auteur, des breuets de reserve & autres prouisions extraordinaires, à tous ceux qui luy en demandoient. Tellement que Nicolas de Clemangie Archidiacre de Bayeux, qui viuoit de ce mesme temps, & fut Secretaire de Benoist XIII. à Auignon, auoit accoustumé de dire que Clement VII. estoit veritablement Seruiteur des seruiteurs: parce qu'il cedit & donnoit tout à l'inopportunité des postulants & demandans, pour retenir chacun en son obeissance. Comme ce Pape arriua en Auignon apres la perte d'une bataille en Italie, l'Histoire des Papes remarque que Jacques Abbé de Clugny le vint saluer, & recognoistre; Et ce fut lors qu'il impetra l'Vnion du Prieuré, Vnion plustost faite par la consideration de la personne, que pour le bien & vtilité de l'Eglise. Et à cause que l'Abbaye estoit riche, comme elle a tousiours esté opulente & de tres-grand reuenue, & n'auoit besoin d'Vnions ny d'annexes, l'on fist vnir ce Prieuré à l'office de Pittancerie, supposant qu'il n'y auoit pas de quoy fournir la Pittance aux Religieux, mais l'Abbé a tousiours jouy de ce Prieuré.

Ce fut aussi vn moyen de fraude que l'on trouua pour eluder les deffenses des Bulles des Papes Gr. IX. & Nicolas III. par lesquelles il est expressément deffendu aux Abbez de Clugny, de iouir d'aucuns Prieurez dépendans de leur Abbaye, *Ne Abbas Cluniacensis aliquem de Prioratibus sibi subiectis ad manum suam retineat*. L'on voulut feindre l'Vnion de ce Prieuré à vn office de l'Abbaye, pour le faire passer entre les mains de l'Abbé.

Aussi l'on n'informa point de la pretendue vtilité ou necessité, pource qu'il n'y en auoit point, & l'Vnion fut faite sans cognoissance de cause, & n'y eut point d'adresse ny de commission *in partibus*, pour s'enquerir de la verité, la Bulle estant emanée du propre mouuement du Pape, executée de sa plaine puissance & autorité, & sans y auoir obserué aucune forme ny solemnité.

L'on void dans la vie de Pierre Maurice Abbé de Clugny, qui fut honoré du titre de Venerable, qu'estant arriué de son temps vne famine & disette de viures

dans la prouince, il se trouua reduit à telle extremité, que de trois cens Religieux qui estoient dans l'Abbaye, il n'auoit pas pour en nourrir cinquante: *Trecenti erant vel eò amplius fratres, nec quinquaginta de proprijs sumptibus domus illa procurare valebat, turba hospitum & pauperum infinitus numerus.* Que fist ce Saint personnage? *missatica ad singulos Prioratus deferri curauit:* c'est à dire, Qu'il enuoya ses mandemens à tous les Prieurs, à ce qu'ils eussent à contribuer chacun pour la nourriture des Religieux de l'Abbaye, mais l'on ne parla jamais d'vnr & supprimer des Prieurez. Ce qui emporte avec soy l'interuersion de l'intention des Fondateurs, & la diminution du culte & du seruice diuin. Comme de fait depuis cette Vnion l'on n'a plus parlé de seruice ny d'office audit Prieuré: l'Eglise n'a plus esté entretenüe, tout y est tombé en ruine, & n'y est plus demeuré ny marque ny vestige de Prieuré.

En fin il y a trente ans ou enuiron que Monsieur le Cardinal de Guise, lors Abbé de Clugny, s'estant fait informer de la qualité de cette Vnion, & en ayant recogneu le vice, la nullité & subreption, & voyant que tous les lieux estoient en ruine & abandonnez, & qu'on faisoit tous les iours saisir pour les reparations, le plus clair reuenue de son Abbaye, il se proposa de remettre ce Prieuré en titre, le des-vnr de son Abbaye & reestabli les choses en leur premier estat.

Pour cet effet le 23. Octobre 1612. il obtient vne signature en Cour de Rome, par laquelle exposant la ruine & desolation dudit Prieuré, *Quod omnia adificia solo adequata & diuinum officium desit ibi celebrari.* Ce qui ne pouuoit estre restably, sinon remettant ledit Prieuré en son premier estat, & supprimant l'Vnion qui en auoit esté faite. Le Pape accorda la suppression de ladite Vnion, & la reduction de ce Prieuré en titre particulier de Benefice, & adressa l'exécution de sa signature à l'Euesque Diocesain, avec la Clause *committatur Ordinario, vocatis Vocandis.* Et pour cela voicy la procedure qui a esté tenue: Monsieur l'Abbé de Clugny se pouruoit pardeuant Monsieur l'Archeuesque de Paris, lequel ayant decerné son mandement pour faire appeller les Religieux, lesdits Religieux à l'instant s'assamblèrent à la voûte de l'Abbaye, & passerent procuration pour consentir la dissolution de cette Vnion, & que ce Prieuré fust reduit comme il estoit auparauant en titre particulier de Prieuré simple, pour estre regy & gouuerné par celuy des Religieux qui en seroit pourueu par Monsieur l'Abbé.

Ce consentement des Religieux communiqué au Promoteur, interuint le premier jugement, par lequel Monsieur l'Archeuesque de Paris commet defunct Monsieur Loisel Conseiller Clerc, pour se transporter sur les lieux, afin de recognoistre ce qui estoit de l'estat des maisons & des bastimens.

Or par l'information & le procez verbal de Monsieur Loisel, les tesmoins déposent qu'ils auoient appris de leurs predecesseurs qui le tenoient aussi de leurs peres par tradition, Qu'il y auoit eu autresfois vn Prieur & des Religieux dedans ce Prieuré, qui y celebrent le seruice, & y faisoient beaucoup de bonnes œuvres & deuotions, dont le peuple receuoit beaucoup de consolation: Qu'on y faisoit aussi plusieurs charitez & aumosnes; mais depuis que l'Abbé auoit le reuenue, l'on n'y auoit plus fait de seruice: qu'on auoit laissé ruiner tous les bastimens, & que le Fermier seulement n'y pouuoit pas loger. Il y eut aussi vn rapport d'Experts, qui estimerent les bastimens & reparations qui estoient à faire, & cette information faicte & rapportée avec le procez verbal des Experts, & communiqué au Promoteur: Monsieur l'Archeuesque de Paris rend la Sentence le 22. Mars 1613. par laquelle l'Vnion & incorporation qui auoit esté faite de ce Prieuré à l'Abbaye, est reuocquée, le Prieuré reduit au premier estat de Prieuré simple.

5

simple, distinct & separé de l'Abbaye, pour estre tenu & possédé par celuy Religieux qui en seroit pourueu par l'Abbé, lequel y feroit celebrer le seruice, remettre & restablir les lieux, & payeroit à l'Abbé la rente & redevance de soixante & quinzeliures, comme on auoit accoustumé par le titre de la fondation.

Cette Sentence ainsi rendüe, Monsieur l'Abbé de Clugny conféra ce Prieuré à Frere Claude Mothé Religieux de l'Abbaye, Docteur en Theologie, qui en prend possession.

Frere Claude Mothé resigna le Prieuré à Monsieur l'Euesque de Beauuais, qui en est pourueu en commande, & en iouit plainement & paisiblement pendant trois années entieres, jusques au jour de son decez aduenü au mois d'Octobre 1616.

Après le decez de Monsieur l'Euesque de Beauuais ce Benefice ayant vaqué par sa mort, Frere Iean le Maire Religieux de l'Abbaye de S. Denis s'en fit pouruoir comme gradué, & Maistre Philippes Maillart en obtint aussi prouision en Cour de Rome, & après auoir plaidé quelque temps au Conseil, le Maire ceda son droit & resigna à Maillart. Et en 1617. Maistre Iean de Hauard qui est le demandeur, en fut pourueu par la resignation pure & simple de Maillart, & en a iouy plainement & paisiblement depuis le 2. Féurier 1618. qui est la datte de sa prise de possession jusques en 1633. pendant seize années entieres, durant lesquelles, & encore sixiours auparauant, cette Desunion a tousj ours esté executée, Messieurs les Abbez ayans receu la rente de soixante & quinze liur. dont le Prieuré est chargé par sa fondation: Et Monsieur le Cardinal de Richelieu ayant esté pourueu de l'Abbaye de Clugny en 1630. & fait Chef & general Administrateur de l'Ordre, a executé luy mesme cette Desunion, son Receueur ayant receu la rente de soixante & quinze liures trois ans durant, & son Grand Vicairé ayant visité ledit Prieuré comme vn titre de Benefice particulier, dependant de l'Abbaye, trouué que les lieux estoient en bon estat, le demandeur y ayant fait pour douze mille liures de reparations.

Depuis cela, & en l'annee 1633. Monsieur le Cardinal s'est aduisé de vouloir joüir dudit Prieuré, comme ayant esté autrefois vny à vn Office de l'Abbaye, duquel les Abbez s'estoient accommodéz.

Ce qui luy en fist conceuoir l'enuie, estoient les bois de ce Prieuré, qui estoient deux ou trois cens arpents de bois de haute fustaye, dont il pouuoit tirer comme il a fait vne grande somme de deniers.

Il fait donc entendre au demandeur que son intention estoit d'auoir ce Benefice, & d'en iouyr comme vny à l'Abbaye, pretendant que cette Desunion n'en auoit pû estre faite ny consentie par Monsieur le Cardinal de Guise, lors Abbé, au prejudice de ses successeurs.

On luy remonstre qu'il y auoit plus de vingt ans que cette Desunion auoit esté faite, Desunion qui estoit legitime & Canonique. L'Vnion au contraire vitiueuse & abusive. Que depuis la Desunion ce Benefice auoit passé par trois ou quatre diuerses mains: En fin paruenü en celles du demandeur par vne resignation pure & simple, & en auoit iouy seize années entieres, après lesquelles il ne pouuoit plus estre troublé.

L'on represente tout cela à Monsieur le Cardinal qui persista tousiours en son dessein, & dit qu'il feroit bien voir que cette Desunion n'auoit pû estre faite: Et qu'il ne croyoit pas que le demandeur voulust entreprendre vn mauuais procez contre luy qu'il perdrait. Le Conseil jugera si ces paroles proferées de la bouche de Monsieur le Cardinal dans l'autorité & le pouuoir absolu qu'il auoit,

p

pas capables de donner de la crainte & de la terreur, mesmes aux plus
s & aux plus constants.

Le demandeur n'ozant plus se presenter deuant luy apres ces menaces, interposa
quelques personnes qui luy parlerent en sa faueur, lesquelles il rejeta absolu-
ment: & pour monstrier qu'on ne deuoit rien esperer de luy il fist assigner le de-
mandeur au Conseil, & conclud contre luy à ce que sans auoir esgard à la Des-
vnyon faite dudit Prieuré d'Aunay, & Reduction en titre particulier, il fust dit
qu'il demeureroit reüny au corps & reuenu de ladite Abbaye pour supporter les
charges de la Pittancerie.

Neantmoins depuis Monsieur le Cardinal se raduisa, & fait dire au deman-
deur qu'en faueur de sa longue possession il luy accorderoit deux cens escus de
pension sur le reuenu du Prieuré: Et comme on luy eust remonstrier que cette pen-
sion n'auoit aucun rapport ny proportion au reuenu, le Prieuré valant deslors
plus de trois mille liures de rente, Il dit qu'outre la pension il nous feroit resi-
gner vn Prieuré de quinze ou seize cens liures, que tenoit Monsieur le Cardinal
de Lyon, Prieuré sur les frontieres de Picardie, tout proche du païs d'Arthois:
Et duquel, deslors que la resignation en eust esté faite au demandeur, le Rece-
ueur luy fist signifier que tous les Fermiers auoient quitté & abandonné;
qu'il ne receuoit plus aucune chose, & partant qu'il ne luy pouuoit plus rien
payer: si bien que depuis ce temps-là, ce Prieuré est demeuré inutile au de-
mandeur, & n'en a iamais rien touché!

Le demandeur voyant Monsieur le Cardinal fermé dans cette resolution
d'auoir son Benefice, & qu'il ne pouuoit pas resister à sa volonté, qui tenoit
lieu de loy & de necessité à l'endroit de personnes beaucoup plus releuées que
luy, est contraint d'accepter la condition qui luy estoit offerte, estant certain
qu'il ne pouuoit pas refuser son Benefice à Monsieur le Cardinal sans se per-
dre. Il est donc necessité & forcé d'accepter ce qui luy estoit offert, à sçauoir
ces six cens liures de Pension, & ce Prieuré de seize cens liures sur les Fron-
tieres de Picardie, dont il n'a iamais rien touché.

Et sur ce se passa le Concordat le neufiesme Mars 1633. par lequel on fait
Traicter le demandeur par forme de Transaction, sur cette assignation qui
luy auoit esté donnée au Conseil: Et pour terminer ce procez on l'oblige à pas-
ser procuration pour consentir que son Prieuré fust reüny à la menſe Abba-
tiale, & pour cet effet qu'il resigneroit ce Prieuré, cette pension de six cens li-
ures reseruée; Et que Monsieur le Cardinal le feroit pouruoir du Prieuré de
Maintenay sur les confins d'Arthois.

Et comme ce Contract & ce Concordat ne procedoit point d'une volon-
té libre, & que c'estoit vn effect de la violence du temps, le demandeur y
estant forcé par l'autorité absolue de Monsieur le Cardinal, il protesta pu-
bliquement de la force & de la violence: Tellement que ce Contract ayant
esté dressé par les Notaires dès le 4. Mars cinq iours auparauant qu'il ait esté
signé, il fait vne protestation ce mesme iour 4. Mars, par laquelle il declare
qu'il estoit forcé, contrainct & violenté de signer vn Concordat & vne pro-
curation pour resigner son Prieuré. Et qu'il estoit intimidé par les menaces
que luy auoit fait Monsieur le Cardinal, tant de sa propre bouche (ce sont
les propres termes de l'Acte) que par autres personnes, à sçauoir le sieur

Desroches, & les sieurs Scaron, & autres; & qu'on l'obligeoit
de prendre vn Prieuré de seize cens liures seulement, sur les frontieres de
Picardie, pour vn Benefice de trois mil liures, à trois lieues de Paris, & Prote-
ste de nullité contre tous les Actes qu'il pourroit signer pour cet effet & de

faire casser & reuoker le tout quand il auroit la liberté d'agir, & que le temps seroit plus favorable.

Cet Acte playé & cacheté fut exhibé & présenté à deux Notaires du Chastelet, clos & scellé, auxquels le demandeur ayant déclaré qu'il auoit escrit & signé de sa propre main ce qui estoit enclos & fermé dans l'Acte, l'un des Notaires redigea cette declaration & l'escriuit au dos sur la mesme feuille, & en signa l'acte; mais l'autre ne voulut point signer: Tellement que la superscription de cette premiere protestation n'est signée que d'un Notaire & de la Partie.

Le lendemain cinquiesme Mars, le demandeur presenta encore la mesme protestation dans vn autre papier scellé & cacheté, à vn autre Notaire qui la signa pareillement. Et ayant esté aduertie que ce Concordat deuoit estre signé le mesme iour 5. Mars apres midy, & que Monsieur le Cardinal auoit donné son heure, l'on reitiera encore la mesme protestation, & presenta-t-on derechef ce mesme acte, que le demandeur escriuit tout de nouueau, à deux autres Notaires, auxquels pour le faire signer le demandeur declara que le contenu audit acte estoit son testament, ce qu'ils ne refuserent point de signer, si bien qu'il se trouua deux protestations en vn mesme iour.

Ce Concordat n'ayant point encore esté passé ce 5. Mars, l'affaire remise au septiesme, l'on protesta d'abondât pardeuât deux Notaires, de la Force & de la Violence. Estant encore arriué vne autre remise, & le Concordat signé seulement le 9. Mars par Monsieur le Cardinal, dont le demandeur ne fut point aduertie, & ayant esté apporté au demandeur le lendemain dixiesme Mars pour le signer, il declara le mesme iour pardeuât deux Notaires qu'il auoit esté contraint de signer le Concordat & la procuration pour resigner, Et qu'on l'auoit forcé de prendre vn Benefice, esloigné aux extremitez du Royaume.

Cet acte passé pardeuant deux Notaires du Chastelet, ils ne voulurent iamais permettre qu'il y fust fait mention de Monsieur le Cardinal, mais par les circonstances du fait & la qualité du Benefice l'on voit bien que c'est le mesme Concordat contre lequel on auoit protesté auparauant.

Et depuis ce temps là, le demandeur a continué ses Protestations d'année en année, & partout où il s'est trouué il a protesté de rentrer dans son Benefice, & pris tousiours qualité de Prieur d'Aunay. Il a communiqué des protestations es années 1636. 38. & en la derniere année 1641. il en rapporte encore deux faictes en diuers lieux, l'une au pays Chartrain où estoit sa demeure ordinaire, l'autre en la ville de Montreuil en Picardie, où le demandeur s'estoit trouué, & ainsi a continué iusques en 1642. que Monsieur le Cardinal est venu à deceder.

Ceux qui s'arrestent au iugement des songes appellés oneirocritiques, disent qu'ad il s'emble à quelqu'un en songeât qu'il est paruenü à vne grâdeur démesurée, que c'est vn presage de mort: c'est ce que dit Artemidore au li. premier des iugements des songes, chap. 12. *τὸ ὑπὲρ αὐθροπὸν μέγα δοκῆν χαρμέναι θάνατον τῷ ἰδίῳ σημαίνει.* Monsieur le Cardinal est mort s'estant veu non point en songe, mais en verité au plus haut sommet de la grandeur, Tel qu'on peut dire que iamais l'esprit de l'homme ne l'a porté plus haut!

La mort de Monsieur le Cardinal ayant donné au demandeur la liberté d'agir, leuë & osté tout sujet de crainte, aussi tost il fait saisir entre les mains du Fermier & Receueur du Prieuré, ce qu'il pouuoit deuoir, à ce qu'il n'eust à payer à autre qu'à luy. Et obtient lettres au mesme temps, & des le 13. Decembre 1642. pour estre restitué contre le Concordat qu'il auoit signé, & la procuration qu'il auoit passée en faueur de l'Vnion, comme le tout ayant esté extorqué de luy par la Force & la Violence d'un pouuoir absolu.

Sur ces lettres, assignation fut donnée dès le quinzième Decembre aux Religieux, Prieur, & Conuent de l'Abbaye de Clugny, parlant au Pere Procureur du College de Clugny de cette ville, qui a la charge de toutes les affaires des Religieux del'Abbaye à Paris, & qui ne manqua pas aussi de les aduertir: Et les Religieux n'estant point comparus, ils laisserent prendre défaut contre eux, sans que le Procureur du College de Clugny se soit mesme présenté, qui pouuoit en tout cas demander delay pour les aduertir; & à quoy vraisemblablement il n'auoit pas manqué, ny mesme de leur enuoyer les exploits & les défauts qui luy auoient esté signifiez.

Et sur le tout est interuenue Sentence le dernier Ianuier 1643. six semaines entieres apres la premiere assignation, n'y ayant eu aucune precipitation; par laquelle Sentence les lettres ont esté enterinées, les parties remises en tel estat qu'elles estoient auparauant le concordat, & la procuration pour resigner, le demandeur maintenu & gardé en la possession & iouissance de son Prieuré, le Fermier condamné à vuiderses mains. Et en consequence de ce vn Conseiller du Chastelet s'est transporté sur les lieux, & a mis le demandeur en possession: Lequel a trouué estant sur les lieux que Monsieur le Cardinal n'auoit pas eu si tost la resignation du demandeur, qu'il auoit vendula coupe des bois de haute fustaye, dont il auoit tiré vingt-huit mil liures des marchans en deniers comptans, & s'estoit fait descharger par les mesmes marchands d'une condamnation de dommages & interets, & restitution de deniers qu'ils auoient obtenu contre luy pour autres bois qu'il leur auoit vendus, & dont ils n'auoient peu iouir, pour raison de quoy ils pretendoient contre luy plus de trente mil liures: De sorte qu'il a profité de la vente des bois dudit Prieuré de cinquante ou soixante mil liures.

Le demandeur ayant fait bail du reuenu de son Prieuré, & receu deux termes des fruits, Monsieur le Prince a contraint le Fermier de luy payer cette mesme demy année pour la seconde fois: ce que le demandeur a pris pour trouble, & formé complainte, sur laquelle Monsieur le Prince de Conty Abbé de Clugny a esté assigné au Conseil.

Ledit sieur Abbé a demandé la cassation des procedures faites pardeuant le Preuost de Paris, & a interietté appel comme d'abus, de l'execution de la signature pour la des-vnion dudit Prieuré.

Et s'estant trouué qu'un nommé Flacourt s'est fait pouruoir de ce mesme Prieuré: comme vacant par la mort de Monsieur le Cardinal, & en ayant pris possession, il a aussi formé complainte pour raison du possessoire du mesme Prieuré. Voilà l'estat de la Cause.

En laquelle le demandeur pretend monstrier pour le regard de sa complainte de laquelle dependent tous les autres Chefs.

Premierement: Que l'union qui auoit esté faite du Prieuré d'Aunay à l'Office de Pittancier de l'Abbaye de Clugny, estoit nulle, tant en sa Substâce par défaut de cause legitime, qu'en sa Forme, pour auoir esté faite sans Decret de l'Ordinaire, sans connoissance de cause, contre les Constitutions Canoniques, & l'Ordre de Droit: La Bulle plaine d'Obreptions & Subreptions, de Vices & Nullitez qui produisent vnabus que la prescription & la longueur du temps ne peut iamais couvrir.

En second lieu que la Desunion qui a esté faicte, & la Reduction de ce Prieuré en tiltre particulier, en sa premiere nature & qualité de Benefice simple, estoit bonne & valable, la cause iuste & legitime, & que toutes les formes & solemnitez y

tez y ont esté gardées & obseruees: Et que ce Prieuré depuis la Defunion ayât esté possédé par quatre diuers Titulaires, & enfin paruenü au demandeur qui en auoit esté bien & Canoniquement pourueu, & iouÿ paisiblement pendant seize années entieres, Monsieur le Cardinal de Richelieu estoit mal fondé à pretendre ce Prieuré, comme vny à son Abbaye.

Et finalement que la resignation qui a esté faicte par le demandeur & la procuration qu'il a passée pour consentir à la Reünion dudit Prieuré, a esté vn acte de Pouvoir absolu! d'vne Force Maieure! Vn effect de cette Autorité prodigieuse de Monsieur le Cardinal qui commandoit en Souuerain! Tenoit vn chacun esclau de sa Puissance! Ruinoit absolument & Perdoit tout ce qui s'opposoit à luy. Et ainsi cette Resignation n'ayant point esté libre, spontanée & volontaire, mais Violentée & Forcée, Extorquée par Autorité, elle est Nulle, & ne peut subsister. Partant le demandeur bien fondé aux Lettres par luy obtenues, pour estre maintenu & gardé en la possession & iouissance de son Prieuré.

Quant à l'Vnion qui auoit esté faicte du Prieuré d'Aunay à l'Abbaye de Clugny, ou à l'Office de Pittancerie déclaré par les Bulles, il n'y en eut iamais de plus Vitieuse & Abusue: & bien que le Conseil n'ait pas à present à prononcer sur la validité ou inualidité de l'Vnion; neâtmoins il importe d'en remarquer les Nullitez, pour monstrier qu'autant que cette Vnion estoit odieuse & cōtraire aux saints Decrets, d'autant la defunion a esté fauorable, legitime & Canonique, & que la pretention de Monsieur le Cardinal de Richelieu quand il a esté pourueu de l'Abbaye de Clugny, de vouloir iouÿr dudit Prieuré cōme vny à son Abbaye, soustenant que la Defunion n'en auoit peu estre faicte à son preiudice, cette pretention, dis-ie, estoit aussi iniuste, comme son Vnion Abusue.

L'intention du demandeur n'est pas de debattre l'Vnion du Prieuré d'Aunay à l'Abbaye de Clugny, ou à cet office de l'Abbaye, pour estre la Bulle de cette Vnion emanee de Clement VII. qui fut esleu en Auignon pendant le schisme de l'Eglise. Car encore que Clement VII. soit mis à Rome au rang des Antipapes, & qu'on tienne que l'eslection qui y fut faite d'Vrbain VI. estoit legitime & Canonique: Neantmoins la France a adheré à Clement VII. & s'est déclarée de son party, ayant en cela combattu pour ses foyers, & s'estant rangée sous l'obeyssance de son nourrisson Clement VII. qui auoit esté Chanoine de l'Eglise de paris, & Euesque de Cambray. Et puis on sçait d'as la verité de l'Histoire que l'Electiō d'Vrbain VI. à Rome n'auoit pas esté bien libre: Ainsi ce que Clement VII. auroit fait legitimement & Canoniquement, pourroit bien subsister & estre valable, mais ce qu'il a entrepris contre les formes & l'Ordre de droit, sans connoissance de cause, ayant decerné vne Bulle d'Vnion d'autorité absolüe, & contre les Priuilege du Royaume, ne doit pas estre toleré.

Encore que le Pape soit recognu pour Souuerain és choses spirituelles *ἐν ταῖς πνευματικαῖς*, comme Zonare l'appelle, & qu'il ait tout pouuoir sur les Benefices, toutesfois en France cette Puissance Absoluë & Infinie n'a point de lieu, mais celle qui est retenuë & moderée par les Canons & reigles des anciens Conciles. Principalement au faict des Vnions, à l'égard desquelles toute Bulle expediee du propre mouuement du Pape, *authoritate Apostolica & in forma gratiosa*, qu'on appelle, ne sont point receuës. Le Pape doit remettre ce qu'il decerne pour raison des Vnions en cognoissance de cause, Expedier ses Bulles en forme commissioire, Et en faire l'adresse à l'Ordinaire, *Semper in Vnionibus commissio fiat ad partes, vocatis ijs quorum interest*: L'on en a fait mesme depuis vne regle de Chancellerie.

C'est vn des articles pour lesquels on a dit que le Concile de Trente ne

pouuoit pas estre obserué en France à l'esgard des Vnions: particulièrement pource que le Concile astraint bien les Vnions à quelques regles & cognoissance de cause, mais il adjouste, Sinon qu'il soit autrement ordonné par le Siege Apostolique, *Nisi aliter à Sede Apostolica fuerit declaratum*, en la Session 7. au chap. 6. Tellement que le Pape en peut faire à sa volonté: ce qui est contre nos Mœurs & nostre Vlage.

Car il est certain par la disposition Canonique, que l'Vnion appartient aux Euesques, des Benefices qui sont en leurs Dioceses, *Episcopi est Ecclesiarum suarum Diocesis Vnio, & subiectio earumdem*, en ce chap. vulgaire, *sicut Vnire de excessibus Prælatorum*, & au chap. 1. §. *ad hæc, de statu Monachorum*, aux Clementines, *Prioratus & beneficia per locorum Ordinarios Vniantur*. Aussi par nos Ordonnances les Vnions ne se peuuent faire que par les Archeuesques & Euesques dans le destroit de leurs Iurisdctions. On ne laisse pas neantmoins de deferer cet honneur au Pape, que de receuoir ses Bulles, par lesquelles on procede à l'Vnion des Benefices; Mais c'est pourueu qu'elles soient decernées en Cognoissance de cause. Et ne suffiroit pas que la cause fust cogneüe au Pape & narrée dans les Bulles: car il est tenu de donner son Rescript delegatoire *in partibus* à l'effet de l'Vnion, Qui est tousiours en donner le pouuoir & l'autorité aux Euesques, comme il leur appartient: & reseruer neantmoins l'honneur au Pape.

Or l'Vnion dont est question a esté faicte *authoritate Apostolica*. La Bulle porte expressément *prædictum Prioratum authoritate Apostolica Vnimus & Annectimus*. L'on deffend mesme à l'Euesque de prendre cognoissance de l'Vnion, *Diocessani licentia minime requisita*. Il n'y a point d'adresle ny de commission *in partibus*, pour informer de la Necessité & Vtilité de l'Vnion. Ce qui rend l'Vnion absolument Nulle. Le Chapitre *exposuisti de præbendis* du Pape Honoré III. est singulier à ce sujet, car il est escrit à vn Euesque de Vespain en Hongrie, *Vespinienfi Episcopo*, qui demandoit l'Vnion de certaines Chappelles, aux prebendes de son Eglise, *Exposuisti nobis*, dit le Pape, *quod Ecclesia tua Canonici diminuta eorum provisione de redditibus suarum præbendarum nequeunt sustentari*: & pour cela ils demandoient l'Vnion del dites Chappelles: Le Pape respond; *Si euident necessitas vel Vtilitas exigat, præbendas Ecclesie tue poteris de dictis capellis in perpetuum annectendis iisdem augmentare, sicut discretionem præuia videris expedire*. En quoy l'on void côme il laisse la Cognoissance de cause à l'Euesque, la Discretion & le Discernement. Il commence par la clef de la discretion deuant que de se seruir de celle de la puissance, *ante clauem potestatis præmittenda clauis discretionis*.

Le Liure des Epistres du Pape Innocent III. qui estoit pres de deux cens ans deuant Clement VII. monstre bien la forme des Vnions, & comme elles deuoient estre faictes par commission & avec vne plaine & entiere cognoissance de cause, afin qu'on ne die point que cette forme de commettre & deleguer en faict d'vnion, n'a esté introduite que par la regle de Chancellerie du Pape Innocent VIII. Car sur vne demande qui fut faicte au Pape, de l'Vnion du Monastere de saint Solutor en Piedmont; voicy ce que le Pape Innocent III. respondit au liure 3. de ses Epistres, Epistre 155. escriuant à vn Euesque de la Prouince: *Cum Monasterium sancti Solutoris ita in temporalibus & spiritualibus fuerit collapsum, & attritum, ut Monachi qui in dicto Monasterio supererant, cum lachrimis postulauerint à nobis, ut sub disciplina & regimine Cluniacensis Ecclesie possint respirare: Nos tua Discretionis & Prudentie committentes per Apostolica scripta mandamus quatenus inquisita super ijs Veritate diligentius, quod Vtilitati Ecclesie Vtriusque secundum noveris, expedire statuas & facias*: Ce qui monstre l'usage des Bulles en forme

Commissioire en matiere d'Vnion , long-temps auparauant le Pape Clement VII.

Il y a bien quelques exemples dans Gregoire le Grand d'Vnions faites d'autorité absoluë, comme en l'Epistre 7. du liure 9. *Quia Monasterium quod in fundo Martiano prouincie Campanie situm est, ita hostilitate faciente, fuerit desolatum, & ne Vllus quidem monachorum ibi remanserit, illud tuo Monasterio* (il escrit à vn Abbé d'vn autre Monastere) *cum omnibus suis rebus prospeximus Vniendū*: Le mesme en l'Epistre 39. du liure 8. *quia Monasterium Puteolis constitutum quod Falcidia dicitur, ita esse desolatum à Monachis perhibetur, ut non solum Dei illic opus minime celebretur, sed etiam pene pro derelicto habeatur, ideo illud monasterio tuo in perpetuum duximus annexendum*. Et pourquoy le Pape en vse-t'il ainsi? pource que ces deux Monasteres estoient dedans l'Estat du Pape, *quia Monasterium quod in fundo Martiano prouincie Campanie sitū est*, c'estoit en la Campagne de Rome qu'on appelloit *Latium*. Et en cette seconde Epistre, *Monasterium Puteolis constitutum*, estoit à Puzol, *Puteolis*, ville de la Campagne Romaine, partant dans le territoire Romain, dedans l'Estat du Pape; c'est pourquoy il en vse ainsi. Car il faut considerer le Pape, comme ayant deux qualitez, l'vne de Chef de l'Eglise Vniuerselle, l'autre comme Patriarche d'Occident, & Euesque de la ville de Rome. A l'égard de ce qu'il fait dedans son territoire & son département Patriarchal, soit en matiere d'Vnion, ou autrement, il y procede comme bon luy semble, & y agit de Puissance Absoluë: mais en toutes les Vnions qui sont faites ailleurs, le Pape ny procede point de son propre mouuement & autorité seule.

Et ne void on pas en l'Histoire Ecclesiastique d'Allemagne, ce qui se passa en vne Vnion celebre qui fut faicte de deux Eueschez par le Pape Nicolas I. L'Euesque d'Hambour ayant esté ruiné à l'occasio des guerres des Danois ou Normans contre Louys Roy de Germanie, fils de Louys le Debonnaire, qui eut en partage avec ses freres la France Orientale au de là le Rhein, Il fut question pour restablir & remettre cet Euesché, d'y Vnir l'Eglise de Bremen, qui estoit vn autre Euesché. L'Vniō des Eueschez appartenāt au Pape, *sicut vnire Episcopatus ad summum Pontificem dignoscitur pertinere*: voicy neantmoins comme y proceda le Pape Nicolas premier. Le Roys Louis de Germanie luy en ayant escrit, le Pape luy manda qu'on eust à l'informer de la verité du faict, non qu'il n'adioustaist foy à ce qui luy en auoit esté escrit: *Sed ne de ea re deffinisse minus ordinabiliter viderim*. En quoy, l'on void comme le Pape luy mesme s'instruit aux formes. Le Roy là dessus deputa exprés vers le Pape l'Euesque de Constance, pour luy rapporter les preuues qui auoient esté faites, & luy confirmer la verité: surquoy le Pape Nicolas Premier decerna son Decret, qui est rapporté par *Adamas Canonicus Bremensis*, & son Histoire de l'Eglise d'Hambourg, & par *Albertus Crantsius* en sa Metropole Chapitre 39. en ces termes: *Cum Hamaburgensis Ecclesia per barbarorum seuitiam admodum fuerit attenuata, quod per venerabilem Missum reuerendissimi Regis Ludouici Salomonem Constantiæ Episcopum nobis fuit comprobatum, Nos secundum Reuerendissimi Regis votum decernimus, Ecclesias Hamaburgensem & Bremensem non deinceps duas esse, sed vnā*.

Que si cela est pratiqué en l'Vnion des Eueschez, qui appartient de droit au Pape, en quoy personne ne se doit entremettre que luy: que dira-on des autres Benefices, dont l'Vnion appartient aux Euesques? Le Pape Clement VII. aura-il pū vnir vn Prieuré sans cognoissance de cause: sans s'enquerir de la verité du fait? sans informer de l'vtilité ou necessité? & sans obseruer aucune solemnité? Faire

vne Vnion de Puissance Absoluë, c'est contre les priuileges du Royaume, dans lequel le Pape ne peut rien executer sans cognoissance de cause. Si la France a adheré à Clement VII. & qu'elle ait tenu son party, ce n'estoit pas pour y esleuer son autorité par dessus celle des autres Papes, luy faire grace des regles, des formalitez & maximes ordinaires: Ayant fauorisé son party, il estoit d'autant plus obligé d'adherer à nos maximes, conseruer nos libertez & nos priuileges. Qui sont, que le Pape ne peut faire executer ses Bulles en France (celles principalement qui concernent les Vnions) que par Iuges deleguez commis in partibus, pour informer s'il est expedient que l'Vnion soit faite, ou non.

Quoy? vn Abbé & des Religieux auront exposé au Pape qu'un Pittancier n'aura pas de quoy fournir leur portion Monachale, & sans autre preuue l'on fera venir des Prieurez qui sont à cent lieuës de là! A-t'on iamais ouy dire que les Religieux de l'Abbaye de Clugny, l'une des plus riches Abbayes du Royaume, ayent manqué de leur portion & de leur pittance? L'on trouue bien des plaintes qui ont esté faites de leurs excez & de leurs débauches, comme en cette Epistre de Petrus Abbas Cellensis, au Liure 8. Epistre 23. adressée aux Religieux de Clugny, ausquels il parle en ces termes: *Eradicate ex vobis originarium malum de quo pessima seges ad suffocationem Monastica Religionis, suborta est autem consuetudo commessationum & epotationum, quæ sunt post completorium: o fratres, o filii Cluniacenses doleo super ruinam Cœnobij Cluniacensis*. Et si pour les entretenir encores dans les dissolutions & débordemens où ils estoient alors, l'on a fait l'Vnion de ce Prieuré, est-elle valable & legitime? Ou bien si l'Abbé a pris ce Prieuré pour luy, & qu'il en ait tousiours joiuy comme vny à sa Menſe, voyant que les Religieux n'en auoient point besoin, Luy qui en auoit encore moins à faire?

L'on ſçait qu'au Concile de Conſtance en l'an 1417. toutes les Vnions qui auoient esté faictes par les Papes sans cognoissance de cause, furent reuocquées depuis le temps de Gregoire XI. auparauant celle dont est question. A ce Concile assista vn Robertus de Chandefla Procureur general de l'Ordre de Clugny, qui fut depuis Abbé, & l'un des Electeurs du Pape Martin V. comme on void en la Seance 41. du meſme Concile: Et quand cet Abbé donna son aduis sur la reuocation des Vnions qui auoient esté faites sans cognoissance de cause, ne condamna-il pas celle dont est question? L'on a veu que pendant les desordres & confusions qui estoient dans l'Eglise, il s'estoit passé beaucoup de choses contre la regle, la portion, & discipline Ecclesiastique: C'est pourquoy l'on reuocqua tout cela: Et s'il a esté ainsi ordonné à l'égard des Vnions faictes par les Papes que l'Eglise a reputé legitimes, à plus forte raison pour les autres.

L'on dira que cette Vnion ayant duré & continué deux cens tant d'années, ne pouuoit plus estre debatue ny contestee: mais vne Vnion qui est faicte sans cognoissance de cause, contre les Saints Decrets & Constitutions Canoniques, particulièrement celle qui est faicte de plain pouuoir & autorité du Pape contre la loy du Royaume, par laquelle aucune Bulle d'Vnion & autre ne se peut executer en France d'autorité Absoluë: cela ne se confirme iamais par aucune prescription, & par quelque laps de temps que ce soit.

La distinction que Maître Charles du Moulin apporte sur ce sujet, est tirée des Arrests du Conseil, comme il faut demeurer d'accord que c'est en ce lieu où l'on puisse comme en sa viue source les décisions veritables & les maximes plus certaines sur toutes ces questions, & où la Iustice jette ses rayons aussi purs & aussi luisans pour l'esclairciſſement de toutes ces difficultez, qu'en aucun lieu du monde.

Il a esté iugé, dit Maistre charles du Moulin en son Conseil 44. par Arrest du grand Conseil du 24. May 1534. *Relatore felicitis memoria domino Brasao vivo integerrimo Consiliario, deinde Praside dignissimo*, pour l'Vnion d'une Preuosté qu'il appelle *prepositatus de Capella*, à l'Abbaye de Bremtome en Perigord, Qu'apres vn long tēps l'on n'est point obligé de rapporter les pieces iustificatiues des formes & solemnitez de l'Vnion, & luffit qu'elles soient rapportées dedans l'aëte Comme en ce procez là on demandoit qu'on rapportast l'enquête, & l'information sur la Necessité avec le consentement du Chapitre, l'on iugea qu'apres vn long temps, l'Vnion estoit de l'an 1467. l'on estoit deschargé de rapporter ces pieces, & que l'Vnion deuoit demeurer. Pource que si vne Eglise auoit iouy d'un Benefice, comme vny pendant quarantē ans, quoy qu'on ne rapportast point d'Vnion, elle seroit neātmoins maintenue en la possession, *Vna Ecclesia potest prescribere aliam tamquam Vnitam, si ita eam tenuerit per 40. annos*, en la Clementine vnique de *excessibus Prælatorum*.

Mais quand on rapporte le titre de l'Vnion, & la Bulle par laquelle on void qu'il n'y a eu aucune forme ny solemnité gardée, & qu'on recognoist que l'Vnion est faite en pleine puissance, & d'autorité absolue, sans cognoissance de cause, le temps ne couure point cette Nullité! Quand le titre est vicieux, que le vice est en la racine & en la naissance de l'aëte, le temps ne le peut iamais valider ny confirmer. Et à ce propos du Moulin rapporte vn autre Arrest du Conseil de l'an 1535. pour l'Vnion de la Cure de Sevre en Bourgogne, au Chapitre de Bezançon: L'Vnion auoit esté faite en l'an 1464. par Bulle du Pape Pie, & cette Vnion par Arrest du Conseil fut déclarée nulle & abusive, dit du Moulin, *nonobstante quod dicta Parrochia fuisset per dictum Capitulum possessa per 70. annos, quia Vnio erat abusua, nempe facta per papam sine causa cognitione, cum debuisset fieri per commissionem ad partes*. C'estoit vne Vnion comme celle cy, & in production tituli Vnionis, adjouste le mesme auteur, *apparebat de Vicio & nullitate, & sic non potuit solemnitas presumi, quia de contrario apparebat*.

Lucian au Liure 2. de ses Arrests, titre 3. dit qu'une Vnion fut déclarée abusive apres trois cens ans, sur l'appel interietté par Monsieur le Procureur General: *Beneficij Ecclesiastici coniunctionem non rite ordine nec solemnibus obseruatis factam prouocatione à veluti abusu conuelli, longissima annorum serie nempe trecentorum non impediante*. L'Vnion de l'Eglise Saint Sauueur de cette ville au Chapitre Saint Germain de l'Auxerrois a esté reuouée apres cent ans sur l'appel comme d'abus, qui en fut interjeté, pource qu'il y auoit defaut aux formalitez, & que la recognoissance de cause n'estoit pas entiere: *vidi appellari ab abusu*, dit Rebuffe en sa pratique, *ab Vnionibus factis sine causa cognitione, etiam post longissimum tempus centum annorum, quia talis abusus non prescribitur, & est Praxis Regni*.

Et pourquoy ne considere t'on pas le long temps en cela? Pource qu'il y va des priuileges, prerogatiues du Royaume, & de nos franchises. C'est la loy de l'Estat, que les Bulles du Pape, & les Lettres Apostoliques ne s'exercent point en France d'autorité absolue, mais en cognoissance de cause, par Iuges deleguez par autorité ordinaire: Et ce qui se fait au contraire, n'est iamais confirmé par le temps, L'autorité de le reuoker est eternelle, le droit de s'en plaindre perpetuel, imperscriptible & à iamais durable. L'on ne prescript point, disoit Themistocle, contre les Dieux & contre la Republique: l'abus parmy nous, celuy principalement qui se fait par attentat & par entreprise sur l'autorité du Roy, & contre nos priuileges, ne prend iamais de si profondes racines, qu'il ne soit tousiours temps de l'arracher.

Quoy nos Rois dont l'humanité & la bonté naturelle a tousjours surmonté la puissance & l'autorité, ne permettent pas que leurs volonte^z soient executées sans cognoissance de cause, & ont institué les Compagnies Souueraines, ces Corps Augustes de la Iustice suprême du Royaume, pour temperer leurs Commandemens absolus, par leurs prudents Conseils; Comme le cœur se sert du cerueau son premier maistre, qui est le siege de la prudence, pour moderer par sa froideur les esprits, & en rabattre vn peu la chaleur & la vehemence. Et le Pape agira en France en toute licence & liberté? Il n'aura que sa volonté pour Regle, fera executer ses Bulles de puissance absoluë, sans cognoissance de cause, & de plaine Authorité Apostolique? C'est ce qui ne se peut pas permettre: Vne Bulle decernée de la sorte, soit pour Vnion ou autrement, comme celle du Pape Clement VII. pour l'Vnion du Prieuré dont est question, ne peut donner & attribuer aucun droit, ny produire aucun effect, & la longueur du temps ne la confirme point.

Et c'est pourquoy l'Arrest du Parlement de Paris, lequel on pretend auoir confirmé cette vnion en l'an 1598. est fort suspect de collusion & d'intelligence: Et de fait il se trouue que le reglement sur l'appel comme dabus a esté passé volontairement & par appointé entre les deux Procureurs, la cause n'ayant iamais esté plaidée. Ce fut vne adresse de Claude de Guise lors Abbé de Clugny, & vn tour de souplesse qui meriteroit d'estre adiousté à la Legende de sa vie; lequel scauoit les plaintes que les Religieux faisoient de ceste Vnion: tellement qu'en vn Chapitre general qui fut tenu à Clugny en 1572. il leur auoit promis de leur delaisser ce Prieuré qui est à trois lieues de Paris, pour l'entretènement de leurs Escoliers au College de Clugny de ceste ville. A fin de se degager de sa promesse, & s'asseurer par mesme moyen contre les defauts & nullitez de ceste vnion, il suscita vn Religieux de saint Benoist, mais qui n'estoit point de l'Orde de Clugny, lequel se fit pouruoir de ce Benefice par Monsieur l'Euesque de Chartres, en vertu d'vne Requeste présentée à la Cour, pource qu'alors on n'alloit point à Rome. Lon voit au procez que sa prouision luy auoit esté expediee en blanc, c'est à dire sans exprimer le Genre de Vacation, ny declarer le nom du dernier Titulaire. Et avec ce Religieux nommé le Comte, sans qu'aucun de l'Abbaye de Clugny en eust connoissance, Claude de Guise lequel n'allegua iamais autres moyens, & ne proposa iamais autre chose contre ce Religieux, sinon qu'il n'estoit point Partie capable de debattre cette Vnion, il se fait maintenir en la possession de ce Prieuré, & sur cet appel comme d'abus réglé, comme dit est du contentement des Parties, elles furent mises hors de Cour & de procez. Ainsi fut confirmee cette Vnion sans contradicteur legitime avec vne Partie qui n'estoit point capable de le contester; Encore l'Arrest est il donné sur vne supposition que la Bulle d'Vnion estoit de Clement VI. & partant non comprise au Decret du Concile de Constance; & que ladite Vnion auoit esté faite à la Menſe Abbatiale, & non à la Pittancerie: Si bien que l'arrest n'est point interuenu sur la veritable Bulle, & n'a point confirmé c'elle dont est question.

Après auoir montré au Conseil la nullité de l'Vnion qui auoit esté faite, il est aisé de faire voir la validité de la Desunion, & avec cet aduantage, que quand l'Vnion mesme seroit aussi legitime comme elle est Nulle & Abusiue, la Desunion n'en seroit pas moins valable.

La Desunion des Benefices est d'autant plus fauorable, que l'Vnion en est Odieuse, Vnion qui va à la diminution du culte & du seruice de Dieu; à ruiner

les Eglises, & interuertir les fondations; deserrer les Monasteres, & frustrer les Graduez de leur attente & legitime esperance, Vnion contraire au Droit commun, par lequel chaque Eglise doit auoir son propre Prestre, chaque Benefice son Titulaire: *Singuli per singulas Ecclesias & singulos titulos debent ordinari*: comme il est dit dans cette Epistre celebre du Pape Dionysius, pour la diuision des parroisses. L'Vnion donc cōme contraire au droit commun, est reputée Odieuse, ambitieuse & des-auantageuse à l'Eglise: La Desunion au contraire, fauorable & naturelle, n'y ayant rien plus iuste & raisonnable que de remettre vn Benefice en son premier estat, les choses retournant naturellement à leur premiere forme: *Nec causa dotis deterior*, dit la Loy, *cum sua forma redditur*.

Ce ne sont pas les premieres desunions qui ont esté faites en la maison de Clugny, & ne faut que voir pour cela la Bibliotheque de l'Ordre, qui est le liure dans lequel sont compris les Bulles & Priuileges des Papes concedes à l'Abbaye.

En celiure est referée vne Bulle du Pape Alexandre III. pour l'vnion du Prieuré de Paroy en Bourgogne, qui estoit de l'Ordre de Clugny: *Priuilegium Alexandri Papæ in quo Prioratus de Paredo vnitur Ecclesiæ Cluniacensi*. Et apres l'on void comme sous le Pape Clement VI. qui estoit quasi deux cens ans apres, cette Vnion fut reuokée. La Bulle rapportée en ces termes: *Bulla Clementis Papæ de reuocatione vnionis prioratus de Paredo factæ Monasterio Cluniacensi*.

Mais il y a vn autre exemple de Desunion qui est bien plus notable dans les conseils de Decius, c'est au Conseil 275. Il y auoit eu vne ancienne vnion faite à l'Abbaye de Clugny, du Doyenné Rural de Montbertaud au Diocese de Lion, dependant de ladite Abbaye: Le Pape auoit decerné ses Bulles de desvnion, & donné pour cela des Commissaires de l'Eglise de Morienne en Piedmont. Ces Commissaires ayant trouué que l'vnion de ce Prieuré ou Doyenné auoit esté mal faite, ils consulterent Decius, sçauoir si ceux qui estoient commis pour desunir, pouuoient declarer vne vnion nulle. Decius respond qu'ils deuoient suiure les termes de leur commission, apparoißant par l'Enqueste qu'il y auoit cause legitime pour desunir: *Quia testes deponunt quod in dicta Ecclesia antiquitus soliti erant esse 12. Religiosi cum Decano, qui commode ibi poterant sustentari, & quod ibi nullus hodie residentiam faciat, & Ecclesia sit adeo desolata ut ibi reponatur blatum, foenum, &c.* Qui est toute la mesme description que celle du procez verbal de Monsieur l'Oisel. Decius leur donne aduis de proceder par Desunion: *Predictam vnionem dissoluere & dictū Decanatum ad primum statum reuocare*; & leur prescrit mesme le formulaire de leur Sentence: ce qui fait voir que l'usage des Vnions n'est point nouueau dans l'Ordre de Clugny.

Et Monsieur le Cardinal luy-mesme en 1638. a procedé à la Desunion des Prieurés de Marmesse & Montereau de l'Ordre de Clugny, & decerné son Ordonnance pour cela, comme Abbé de Clugny, nonobstant laquelle le Conseil ordonna par son Arrest qu'on obtiendrait Bulle de Desunion en Cour de Rome.

Les des-vnions donc ne sōt point nouuelles dans l'Ordre, & ont esté pratiquées de tout temps en l'Eglise, au moins depuis qu'on y a parlé d'vnions, & tous ceux qui ont escrit des Vnions traittent en suite de la Desunion. Rebuffe en sa pratique apres son titre *De vnionibus*, fait vn chapitre entier *De Reuocatione vnionis*; Et Pierre de la Peruze *Petrus de Perusio*, qui a fait vn liure entier des Vnions, fait sa seconde partie *De dissolutione vnionis*; aussi il y en a des exemples bien anciens. L'Eglise de Tournay ayant esté autrefois vnie à l'Euesché de Noyon, &

& cette vnion ayant duré plus de quatre cens ans, les habitans de la ville de Tournay deputerent par deuers le Pape pour le prier de restabliſſer leur Eueſché, & diſſoudre cette ancienne vnion; Surquoy Yves Eueſque de Chartres eſcriuit au Pape Paſchal en ſon Epiſtre 238. & le perſuada & pria de n'en rien faire, luy remonſtrant quel'Eueſché de Tournay n'auoit pas aſſez de bien: *Et cum dignitas Episcopalis paupertatem honeste ferre non possit, cauendum, ne ista diuisione & separatione uterque Episcopus pauper fiat.* Nonobstant quoi le Pape ne laissa pas de faire la des-vnion, & s'estant trouué au meſme temps à Rome vn Anſelmus Abbé de ſaint Vincent de Laon, & les habitans l'ayant demandé pour Eueſque, le Pape leur accorda: C'est ce qui eſt rapporté dans l'appendice & continuation de la Chronique de Sigebert en l'an 1147. où il eſt dit que le Pape reſtabliſſit l'Eueſché de Tournay, en le des-vniſſant de celui de Noyon: *Disiungendo & separando ab Episcopatu Nouiomensi.*

Il y a vn exemple bien ſingulier d'une Deſvnion au Chapitre 1. *Ne sede vacante*, qui eſt du Pape Innocent 3. Le Monastere de Glaſir en Angleterre auoit eſté Vni à l'Eueſché de Bathe, *Bathoniensi Ecclesia*, par le Pape Celeſtin 3. l'on en demanda la Deſunion au Pape Innocent ſon ſucceſſeur, & *ab eo petierant quidam Monachi, ut Vnione penitus dissoluta, Monasterium reduceretur ad antiquum statum sub Abbatis regimine gubernandum*: Le Pape voulut ſçauoir ſ'il y auoit cauſe legitime pour Deſunir, & ayant trouué que cette Vnion eſtoit beaucoup preiudiciable, & *quod per eam religio dissolueretur, fraudaretur eleemosyna, & hospitalitas tolleretur.* Le Pape accorda la Deſunion, neantmoins il dit, *Qu'il falloit attendre quel'Eueſché de Bathe fuſt remply, pource que l'Eueſque eſtoit decedé, & cependant que le Monastere ſeroit regi par vn Prieur, Interim Monasterium sub cura Prioris gubernandum.*

Auſſi y a-il rien plus iuſte & legitime qu'une Deſunion? Vn Benefice aura eſté Vny à vn autre, à cauſe du peu de reuenu, & quand le bien de l'Egliſe eſt acreu & augmenté, cette Vnion naturellement ne doit-elle pas ceſſer par la ceſſation de ſa cauſe? La neceſſité faiſt naiſtre les Vnions qui ſe font legitiment, & avec cognoiſſance de cauſe, *Si euidentis neceſſitas aut utilitas exigat*, comme il eſt dit au Chapitre *expoſuiſti de præbendis*, & comme la neceſſité l'a faiſt naiſtre, elle doit prendre fin en ſa fin, & ſ'en aller avec elle.

Nous auons l'exemple d'une Vnion qui fut faiſte par le Roy Charles le Simple, de l'Abbaye ſainct Leufroy, autrement appellée l'Abbaye de la Croix ſainct Oüen au Diocèſe d'Eureux. Ce Monastere ayant eſté entierement ruiné pendant les guerres, le Roy qui diſpoſoit lors plainement des Abbayes, & en donnoit prouiſions ſuiuant l'vſage & la pratique du temps, auoit vny cette Abbaye à celle de ſainct Germain des Prez, & y auoit transferé les Religieux: Les Lettres d'Vnion ſont tranſcriptes tout au long au Liure 5. de l'Histoire d'Aymon, Chapitre 41. *Cum oporteat nos non modo præſſe, ſed etiam prodeſſe Eccleſiis præſertim dirutis feritate paganorum donauimus & ſubiecimus Abbatiam qua Crux ſancti Audoeni nuncupatur ſancto Germano & eiſdem Monachis ad victum, veſtitum, & ceteros vsus Monachorum ſancti Germani.* Et ſi teſt que la guerre fut finie, cette Vnion fut reuouquée par le Roy, & l'Abbaye remiſe au premier eſtat. Tellement que l'Auteur de la vie de ſainct Leufroy, imprimée à Paris en 1591. parlant de cette Vnion & tranſlation, dit, *pacato à Rege cum Normanis bello, Monachi ſancti Leufridi repetierunt antiquos cænobii ſui Lares, & bona eis reſtituta fuerunt*: ainſi l'Vnion fut reuouquée.

Il s'eſt pratiqué autrefois dans l'Egliſe vne eſpece d'Vnion, appellée Incardination,

dination, lors qu'une Eglise ayant esté ruinée, on l'unissoit à une autre qui estoit vacante, laquelle on donnoit en commande au Titulaire de la premiere, les Commandes alors n'estant pas titres de Benefices, mais simples administratiōs. De sorte que le reuenu des deux Eglises estoit vny, regi & gouverné par vn mesme Euesque, Abbé, ou autre, & celuy qui estoit ainsi ordonné à cette seconde Eglise, en estoit appellé *Presbyter Cardinalis*: ainsi s'entend le Canon, *Fraternitatem distinct. 71. Fraternitatem tuam à nobis petiisse recognouimus, ut gratia Ecclesie Benasiana Diaconatum tuæ concederemus Ecclesie Incardinandum.* Et en cette Epistre 13. de saint Gregoire, au Liure 2. *Quia ob cladem hostilitatis, Agnellus Episcopus de Fundis in Ecclesia sua non possit amplius remanere, Tarracinenſi Ecclesie illum Cardinalem constituimus. Sacerdotem Cardinalem* en ces lieux là ne signifiant autre chose sinon la personne Principale commise à la direction & au gouvernement de l'Eglise, à laquelle la sienne estoit vnée; & cette vnion demeueroit reuocquée, quand les choses estoient remises en vn meilleur estat.

C'est ce qui est dit en cette Epistre du Pape Adrian II. au troisieme Volume des Conciles de France, où il est parlé d'un Actardus Euesque de Nantes, duquel l'Euesché ayant esté ruiné par les infideles, le Pape l'auoit ordonné à l'Archeuesché de Tours: les termes de l'Epistre sont: *Constituit eum Turonensi Ecclesie Cardinalem, sed si Nannetica contigerit Ecclesia ad priorem statum redire, nihil officiat ei hac necessitatis vnio, quam exigit Paganorum vastatio quominus ad propriam redeat Ecclesiam.* Ce qui fut encore pratiqué en la personne de Frotarius Archeuesque de Bordeaux: comme on void en vne Epistre du Pape Jean VIII. au Roy Charles le Chauue: *cum consiterit nobis de exterminio Burdegalsis Prouincia, Frotarium Burdegalsensem Episcopum in Bituricensis Ecclesiam ordinauimus Cardinalem, sed cum hoc non modica interueniente necessitate ob Barbarorum Vastationem concedamus, sciant quod tali necessitate remota, remouetur etiam id quod necessitas imperauit.* Pour monstrier que les Vnions, mesme celles qui sont faites pour cause necessaire, se reuocquent d'elles mesmes quand la cause de l'Vnion vient à cesser. Combien plus quand la reuocation de l'Vnion est faite avec plaine & entiere cognoissance de cause, & qu'on en a recogneu la Necessité & l'Vtilité.

Et apres ce qui s'est passé en la des-Vnion du Prieuré dont est question, Monsieur le Cardinal estoit-il bien fondé à pretendre de uoir iouir de ce Benefice, comme vny à sa menſe Abbatiale, & dire qu'on n'auoit peu en cōſentir la des-Vnion au prejudice des Abbez successeurs? Il est biē vray qu'un Euesque & un Abbé qui confere & donne en titre vn Benefice vny à sa Menſe, cette des-Vnion ne peut pas preiudicier au successeur, si *Episcopus vel Abbas*, dit Rebuffe en son Traitté de la portion congrue, nombre 35. *Ecclesiam suæ menſæ vnitam conferat alicui in titulum, videtur eam separare à Menſa ſua, sed non præiudiciabit ſucceſſori quin Menſæ ſuæ applicet:* Et allegue pour cela la Clementine premiere de reſcriptis: Mais quād la des-Vnion a esté faite par les formes, Qu'elle a esté ordonnée par le Pape, Executée par l'Ordinaire, & avec beaucoup plus de ſolemnitez & plus grande cognoissance de cause que l'Vnion; Sur ce qu'on a veu vn Prieuré Abandonné. Le ſeruiſe negligé! Les baſtimens tombez en ruine! La des-Vnion au reſte ayant esté plainement Executée, Le benefice passé à diuers titulaires! Vn Abbé Successeur venant vingt ans apres, ſe peut-il plaindre de cette procedure legitime & Canonique?

Et n'y a perſonne qui ne juge que toute la grace qu'on euſt peu faire à Monsieur le Cardinal, & toute la faueur qu'il pouoit eſperer, quand bien il y auroit eu quelque chose à redire à la des-Vnion, & qu'elle auroit esté faite par la ſeule

Authorité de Monsieur le Cardinal de Guise: Eust esté attédu la longue jouïssance du demandeur, que *eo cedente vel decedente*, le Benefice demeureroit vny comme auparauât. Mais le depouïller de son Prieuré, duquel il estoit cinq fois Triennial Possesseur, Jamais l'on ne se fust porté à cette Rigueur & dureté.

Mais il faut voir ce qu'on peut opposer contre la des-Vnion, d'autant que Monsieur l'Abbé de Clugny prévoyant bien que le Concordat faict avec Monsieur le Cardinal de Richelieu, & la procuration passée par le demandeur pour resigner son benefice, & consentir qu'il demeurast reüny à l'Abbaye, n'estoient point suffissas pour le priuer de son droit, & l'Abdiquer de son Prieuré, La Force & la Crainte estant claire & évidente en tout ce qui s'est passé. Il a esté contraint d'interjeter appel comme d'Abus de la des-Vnion qui a esté faite, & de l'exécution de la signature, portant la reuocation & dissolution de l'Vnion. En quoy l'on se depart tacitement de tout le droit qu'on pouuoit pretendre au Benefice, en vertu de la Resignation du demandeur; l'On Abandonne & l'on se reduit dedans ce dernier retranchemét à soustenir que la Desunion n'a pas esté bien faicte.

Et neantmoins l'on ne l'a arguée que d'un seul defect, qui est que le consentement du Roy n'y est point interuenu. Il faut donc voir s'il est besoin de l'authorité du Roy pour remettre vn Benefice en sa premiere nature, Restablir vne fondation, Et Reduire les choses au droit cōmun; Il est Vray qu'un Benefice par le moyen de l'Vnion deuiet membre de celuy auquel il est vny; Vray que l'Eglise qui est vnice, appartient en plaine propriété à celle à laquelle l'vnion a esté faicte: D'où l'on dit que le Pape donne les Benefices en tiltre, en commande & en propriété, qui est par le moyen de l'Vnion: Partant la Desunion est vne espeece de demembrement, qui va à la diminution du bien du Benefice, auquel si le Roy auoit quelque interest, l'on ne pourroit pas toucher sans sa permission. Mais quand on dit qu'un Benefice vny passe en la nature de l'autre, & qu'il ne compose plus qu'un mesme Benefice, Cela est bon tant que l'Vnion dure & subsiste: Car quand la desunion se faict, Que la chose retourne à sa premiere nature, Le Benefice demeure tousiours en son premier Estat.

Que si la Priorité & l'Abbaye estoient de fondation Royale, & que le Roy en fust Patron & Fondateur particulier: *Si esset regale Monasterium*, comme il est dit in *Concilio Vernensi*, chap. 20. *aliud est regale Monasterium, aliud Episcopale*: Comme il y a plusieurs Abbayes qui reconnoissent le Roy seul pour Fondateur, pour auoir faict bastir le Monastere & les auoir accreus de reuenus, comme l'Abbaye saint Denis, saint Germain des Prez, & autres. En ce cas, comme l'Vnion n'auroit peu estre faite, sans le consentement du Roy, l'Ordonnance de Blois, art. 23. portant expressement, que le consentement des Patrons est necessaire pour l'Vnion, il faudroit tout de mesme les appeller à la Desunion: C'est ce que traitent les Docteurs, & particulièrement *Petrus de Perusio* au traité de la Reuocation des Vnions, Qu'encore que le Patron en consentant à l'Vnion, ait renoncé à son droit de Patronage, neantmoins pource que l'Vnion estant reuocquée, le droit de Patronage renaist: *Ideo patronus in reuocatione Vnionis debet vocari*. Rebuffe dit le mesme en son Traicté de reuocatione Vnionis. Mais l'Abbaye du Clugny & le prieuré dont est question, n'estant point de fondation royale, le Roy n'estant patron ny de l'un, ny de l'autre, & ne les ayant point fondez particulièrement: comme l'Vnion s'est faicte sans le consentement du Roy, elle s'est peu dissoudre aussi sans son autorité, pource que les choses se dissoluent par les mesmes voyes qu'elles ont esté liées: *nihil tam naturale quam eodem genere quidquam dissolui quo colligatum est*.

Cen'est pas que le Roy ne soit patron General, Gardien, Protecteur &

deffenseur des Eglises de son Royaume, Eueschez, Monasteres, & Abbayes. Tellement que pour ce qui regarde la police, L'ordre & la discipline de l'Eglise luy appartient; le Roy est l'Euesque exterieur, comme on disoit de Constantin, à cause de la garde & de la protection, Ce mot *ἐπίσκοπος* entre ses diuerses acceptations, signifiant vn Gardien & vn Protecteur. Telsmoin cette plainte d'Amdromache dans Homere, au dernier de l'Iliade, laquelle deplorant la mort du valeureux Hector, dit qu'il estoit l'Euesque de sa ville, *πόλις ἡ δὲ κατ' ἀνδρῶν κίρσεται*, la ville sera bien-tost renuersee, & pourquoy? *ἢ ὅτι ὁλοκας ἐπίσκοπος*, l'Euesque en est mort le deffenseur & Protecteur. Aussi le Droit qu'a le Roy sur les Eglises de son Royaume, desquelles il n'est point particulierement Fondateur, c'est vn Droit de garde & de protection, *Monasteria quæ sunt in gardia Regis*, comme il y a dans l'ancien stile du Parlement, au titre de *rescriptis*, & au Concile de Lyon, d'où est tiré le Chapitre 13. de *electionib. qui custodiam, gardiam, aduocationis & deffensionis titulum in Ecclesiis & Monasteriis habemus*, & à cause de ce droit de garde, Le Roy a l'inspection à ce que le bien de l'Eglise ne soit point diminué, Que les fondations soient entretenues, Que les titres des Benefices ne soient point supprimez, Le culte & le seruice diuin non diminué.

Mais quand il s'agit de remettre les choses dans l'ordre & en leur premiere nature, Restablir les titres des Benefices, Maintenir les fondations & reduire les choses au droit commun, il ne faut point le consentement du Roy pour cela: l'interest du Roy n'estant autre que le bien & l'vtilité de l'Eglise. Pour aliener valablement le bien d'une Eglise, il faut Lettres Patentes du Roy; pour le retirer il n'en est point necessaire.

Il est vray qu'à cause de ce mesme droit de garde & de protection, le Roy a la nomination des Eueschez & Abbayes; mais puis qu'il luy a plu declarer qu'il n'entendoit point vser de son droit de nomination sur les Abbayes, portant le titre de Chef d'Ordre, entre lesquelles l'Abbaye de Clugny est nommée la premiere, le Roy voulant qu'elles soient conferees suivant la forme des Elections Canoniques, son droit de nomination n'en peut recevoir aucun preiudice. Lequel d'ailleurs ne pouuoit pas estre blessé par vne Desunion qui est de Droit commun, & vn moyen legitime & Canonique.

Et ce qu'on void à l'exemple de la desunion, de laquelle il est parlé au chapitre, *ne sede vacante*, que le consentement du Roy d'Angleterre y estoit interuenue, & que c'estoit luy qui auoit requis le Pape de Desunir le Monastere dont estoit question, *rex cum regni magnatibus petierat ut Vnionē penitus dissoluta Monasterium reduceretur in statum antiquum*. C'est que l'Union estoit faite à vn Euesché *Ecclesia Bathoniensi*, qui estoit l'Euesché de Bathe, suffragant de l'Archeuesque de Cantorbery, duquel Euesché le Siege estant vacant, le Pape declara qu'on ne pouuoit proceder à la Desunion, *episcopali sede vacante*.

Or s'agissant d'un Euesché auquel l'Union auoit esté faite, & la pretention des Roys d'Angleterre estant lors de iouir à l'exemple de nos Roys des fruits des Eueschez apres le deceds des Euesques; Mesmes de conseruer les Prebendes, dont il y a vne remarque singuliere au Chapitre, *ex diligenti de iure patronatus*, qui setrouue en l'ancienne collection des Decretales, & a esté retranchée de la derniere, où il est dit, *Episcopo de medio sublato & redditibus Episcopatus ad fiscum deuolutis cum quadam præbenda in ea Ecclesia vacasset, dilectus filius noster Rex Angliæ eam Thomæ cuidam clerico contulerat*. C'est ce qui faisoit que le reuenue des Eueschez en Angleterre appartenant au Roy pendant la Vacance, l'on ne pouuoit pas le diminuer sans son consentement: Aussi en France où nos

Royz sont fondez par preeminence & par excellence par dessus tous les autres Royz, comme Fils-Aînés de l'Eglise, à iouir par droit de regale des Eueschez, & en conseruer les Prebendes: & la nomination des Eueschez leur appartenant, comme ayants la garde, & le patronage, & la protection des Eglises: l'on ne pourroit pas alterer ny diminuer le reuenu dudit Euesché par la Desunion d'un Benefice qui y seroit annexé sans la permission du Roy. Le mesme à l'esgard des Abbayes, dont le Roy a la nomination: mais le Roy ayant tousiours déclaré qu'il n'entendoit vser de son droit de nomination aux Abbayes portant letitre de Chef d'Ordre, qui par vn ancien vsage, vn droit particulier & vn priuilege expres, peuuent eslire leurs Prelats; & l'Abbaye de Clugny estant de ce nombre, le Roy n'en ayant point la nomination, son consentement n'y est point necessaire, ny en l'Vnion, comme aussi n'y estoit il point interuenus ny en la Desunion.

L'on a voulu pretendre que cette Desunion auoit esté faite expres, pour faire tomber ce Benefice entre les mains du demandeur, & que le sieur de Ronfieres son pere, estant dans les bonnes graces de feu Monsieur le Cardinal de Guise, l'on procura cette Desunion, pour le gratifier de ce Benefice: Mais c'est vne pure illusion & imagination, car ce Benefice apres la Desunion, fut conseré à vn Religieux de l'Ordre de Clugny, Docteur en Theologie: Ce Religieux le resigna depuis à Monsieur l'Euesque de Beauuais, d'autant qu'il ne pouuoit pas faire les reparations dont il estoit chargé, & que Monsieur l'Euesque de Beauuais pouuoit mieux satisfaire à cette despenfe: Or Monsieur l'Euesque de Beauuais a iouy de ce Prieuré & la possédé trois ans entiers & iusques au iour de son deceds. L'on ne dira pas qu'il ait gardé ce Benefice pour le demandeur, ny qu'il ait esté son confidentaire! Il y en a qui sont naturellement ingenieux à inuenter des choses vray-semblables. *δὲναι γὰρ ἐνθικτοὶ καὶ μεγάλαι φύσιν εὐκατολογίαι*, dit Philon au liure de *legatione ad Caium*, mais il n'est guere probable ny vray-semblable, qu'un Prelat du merite & de la qualité & dignité de Monsieur l'Euesque de Beauuais, Messire René Potier, eust tenu ce Benefice en confidence. Luy qui en est mort titulaire & qui en estoit saisi & vestu au iour de son deceds. Apres lequel ce benefice a esté impetré par des Graduez, qui ont plaidé ensemble, & celuy auquel le Benefice est demeuré par vn concordat, l'a resigné au demandeur, pource qu'il y avoit vn Decret dans sa signature, d'employer tout le reuenu aux reparations: à quoy le demandeur a satisfait & restably tous les lieux en fort bon estat. L'on iugera s'y apres tout cela, on peut dire que cette Desunion a esté faicte par vn dessein concerté & premedité, de nous faire tomber ce Benefice.

La Desunion n'auoit autre cause que l'vtilité de l'Eglise; Cause laquelle estant iuste & legitime, & toutes les formes & solemnitez requises aux Desunions, y ayant esté obseruees: Apres vne Desunion valable, Monsieur le Cardinal ne pouuoit plus pretendre ce Benefice, comme vny à sa menfe.

Aussi ce n'est pas le droit que Monsieur le Cardinal y pouuoit auoir, qui a faict resigner au demandeur le Prieuré dont est question: son droit estoit trop foible & basti sur vn fondement trop ruineux; mais c'est le Pouvoir & l'Autorité absoluë de Monsieur le Cardinal, qui a tiré & extorqué cette Resignation.

Le demandeur ne pretend pas blesser ny offenser la memoire de Monsieur le Cardinal de Richelieu, encore qu'elle ait esté depuis peu cruellement attaquée, & par ceux mesme qui sembloient estre obligez de la defendre: il est à
present

present constitué au lieu de repos : *Terra sacra*, disoit Pline, *quia nos sacros reddit*, & l'Eglise appelle la mort des Chrestiens, le sommeil de la paix.

Mais il dira seulement par la permission du Conseil, & sans excéder les bornes d'une iuste moderation; que si mettant à part les Excellentes Qualitez de Monsieur le Cardinal, Ses Merites Signalez & Ses vives Affections & Volontez Ardentes à la Gloire de l'Estat, on luy peut imputer quelque défaut: comme les Astres les plus lumineux ne laissent pas d'auoir leurs taches, mesme ceux qui esclairent par dessus tous les autres; Et s'il est permis de l'accuser apres sa mort, c'est d'un crime dont il est parlé en la Loy premiere, au C. de *generali abolitione*, & qui est appellé *crimen Potentatus*, Luy en la main duquel estoit tout le commandement, *Socium magis imperij, quam Ministrum agens*, comme on disoit de *Mutianus* dans Tacite, Luy dont la volonté ne pouuoit souffrir aucune opposition, ny le commandement, de resistance.

On dit, & c'est Lampridius qui le rapporte, que le Prefect du Pretoire à Rome, estoit appellé *Secundus Imperij*, ou bien selon Zozime, *αρχι δευτερος τῶ τῶν οὐκιστων*, & le pouuoir de cette office estoit quasi aussi grand que celuy de l'Empereur, tellement qu'on l'appelloit, *Imperium sine purpura*, *βασιλ' ἐκ τῶν πορφυρας*, comme Ennaeus le tesmoigne. Mais on peut dire que Monsieur le Cardinal de sa Charge de premier & principal Ministre auoit fait vn Empire, & qui estoit accompagné de pourpre. Empire lequel les plus grands du Royaume ayant redouté, commēt vn particulier, comme le Demandeur, eust-il peu s'opposer à sa volonté? Refuser celuy qui auoit pouuoir de contraindre; & qui dispoit de la vie; des biens; & de la fortune d'un chacun; Le moindre desir qu'eust tesmoigné Monsieur le Cardinal à qui que ce fust, d'auoir vn Benefice ou autre chose dans le pouuoir absolu qu'il auoit, estoit vne force assez puissante pour le contraindre à le remettre & resigner. Force Maieure qu'appellent nos Loix Force diuine, *δυνάμις θεῶν*, ou comme les Basiliques l'ont traduit, *supervia*, la Cholere de Dieu. Comme quelquefois ces Faveurs Prodigieuses, Ces puissances seffroiabiles & espouuantables, auxquelles chacun fait ioug & preste obeissance, sont des tesmoignages de l'ire & de la vengeance de Dieu.

Quand on a veu apres le decez de Monsieur le Cardinal, des eslargissemens de tant de personnes, des appels de tant de bannis, & tant de gens remis dans leurs biens, Cela tesmoigne que son gouvernement estoit tel, que ce qui a esté consenty par le demandeur à l'égard de la resignation de son Benefice, n'estoit pas libre & volontaire, & que c'estoit par crainte & intimidation. Et ne falloit que l'image & la representation de tant de gens chassez, mal traitez, & depouilleez de leurs biens, sans forme de iustice, pour forcer & contraindre le demandeur à ceder & quitter à Monsieur le Cardinal ce qu'il desiroit de luy, & dire avec ce Poëte de la Lyre Romaine,

Hac ego si compellar imagine, cuncta resigno.

La preuve de la violence est-elle pas verifiée par les protestations qu'on void, & qui ont precedé le Cōcordat? Il y a trois ou quatre protestations par lesquelles le demâdeur a déclaré qu'il estoit forcé par les menaces & intimidations qui luy auoient esté faictes, tant de la propre bouche de Monsieur le Cardinal, que d'autres personnes de sa part, à resigner. Vn homme qui s'est premuny de tous les actes, monstre bien que ce qu'il deuoit signer ne procedoit point de sa volonté. Si l'on considere aussi ce qui a suiuy le Concordat, l'on a encore protesté apres qu'il a esté signé, & déclaré que c'estoit par impression, par autorité & intimidation, & qu'on entendoit se plaindre lors qu'on auoit la liberté d'agir.

Mais cette continuation de protestations de temps en temps, & iusques au iour du decez de Monsieur le Cardinal, par lesquelles le demandeur a tousiours pris la qualité de Prieur d'Aunay, n'estoit-ce pas vn tesmoignage apert & manifeste, qu'il n'a iamais eu intention de quitter son Benefice, ny déposé la volonté d'y r'entrer, & si bien il a signé le Concordat, & la procuration pour resigner, accepté la signature de la pension, & touché les arrerages d'icelle, qui semblent estre autant d'actes de volonté. C'a esté vne volonté inuolontaire, *volens quidem, sed inuito animo*, *ἐκεῖ ἐπὶ ἀέκων τι ἔδωκεν*.

Au reste le demandeur n'est pas le premier qui a protesté contre des actes & des contractz passez: N'a-t-on pas veu en l'Audiance de la grand' Chambre, depuis trois mois, en la cause de Monsieur le Duc de Lesdiguières, contre Madame de Canaples, rapporter vne protestation faicte par Madame de Canaples en forme de testament cachetté & scellé, dont l'ouuerture auoit esté faicte pardeuant Monsieur de la Nauue: Par laquelle Madame de Canaples disoit n'auoir signé le contract de transaction d'entre Monsieur de Lesdiguières & elle, sinon par le respect & la crainte de Monsieur le Cardinal, Qui s'interessoit en leur affaire, à cause d'une fille vnique qu'auoit alors Monsieur de Lesdiguières, heritiere de quatre cens mille liures de rente qu'il destinoit pour l'un de ses parens: au sujet de laquelle protestation Monsieur l'Aduocat General dit hautement, parlant de Monsieur le Cardinal, *timeri meruit, quia nihil timuit*.

Depuis on a plaidé aux Requestes du Palais la cause du sieur Marquis de Sourdis contre Madame d'Esquillon sur des Lettres de rescision contre vn Contract d'eschange passé entre Monsieur le Cardinal & luy, pour raison d'une terre pres du Duché de Richelieu, que Monsieur le Cardinal s'estoit faict donner en eschange pour des Rentes sur la ville, où l'on fist lecture des protestations qui auoient esté faictes.

Mais il y a vn Exemple bien plus proche, qui est comme domestique à Monsieur le Prince de Conty: Car Monsieur le Prince son Pere, mariant Monsieur le Duc d'Enguien avec la Niepce de Monsieur le Cardinal, a protesté luy mesme contre la renonciation portée par le Contract à la succession dudit sieur Cardinal, l'acte de protestation contenant: *Qu'il estoit forcé d'accepter cette condition par le respect & consideration dudit sieur Cardinal, & du grand Pouvoir & Authorité qu'il auoit dans le Royaume, ne pouuant pas y contredire ouuertement sans vn hazard inéuitable à ses biens & fortunes*.

Et trouuera-t-on estrange si les plus grands du Royaume redoutans la puissance de Monsieur le Cardinal, & ne luy osant pas resister ouuertement, Ont protesté par Actes secrets & cachez, contre vn Acte si solennel qu'un Contract de Mariage, Qu'un particulier & vn simple Beneficier qui auoit vn Prieuré à trois lieues de Paris, d'un reuenu assez considerable, & auquel Monsieur le Cardinal auoit affection pour disposer comme il faict des Bois qui en dependoient: Ayant esté contraint de le resigner, ait protesté contre la resignation, & déclaré qu'on luy extorquoit son Benefice contre sa volonté. Cette contestation de volonté contraire tant de fois geminée & reiterée deuant & apres l'Acte, & continuée sept ou huit ans durant, monstre bien Que l'Acte n'estoit point libre ny volontaire, Que c'estoit vne piece de contrainte que la violence auoit arrachée des mains du demandeur.

Et ne faut point se mettre en peine de rechercher la preuue de la Force, & que la resignation ne procede point de la pure, libre & franche volon-

ré du demandeur. La chose en rend des tesmoignages qui sont indubitables & irrefragables : & la cause pour ce regard n'a point besoin d'estre esclairée d'ailleurs que d'elle mesme, comme les choses qui sont si claires de soy, qu'elles fournissent la lumiere pour se faire voir. La Cause est Claire & Evidente, Elle esclatte de sa propre lueur, & reluit de sa propre lumiere!

Le demandeur estoit Possesseur paisible d'un Prieuré simple à trois lieues de Paris, de douze cens escus de reuenu, affermé depuis 4500. liures, dont il auoit iouy seize années entieres, Et on luy fait resigner ce Prieuré pour six cens liures de pension, & vn autre Prieuré de seize cens liures, sur les Frontieres de Picardie, à vne demie lieue d'Heudin : duquel il n'a iamais rien touché jusques à present. Et de son Prieuré Monsieur le Cardinal a receu plus de douze mille escus depuis qu'il en a iouy, sans les Bois, dont il a tiré encore dix mille escus. Peut-il tóber sous le sens, & entrer dans l'esprit de qui que ce soit, que le demandeur ait passé ce concordat volontairement. *Nulla ratio hoc verisimile reddit ut quisquam Beneficium multis forte expensis, & laboribus quasitum, quo sustentari debeat, facile sua sponte resignet*, comme il est dit au Chapitre *Super hoc de renunciatio- ne*. La preuue de la Force reside en la chose mesme, *res ipsa mentem in se continet*, Preuue qui se tire de l'interieur, & s'exprime comme des entrailles de l'affaire. Le Iurifconsulte appelle ces preuues *Viscerales probationes ex re ipsa*, & les Rhetoriciens Grecs, les Reliques de la Chose *ῥητορικὰ τῶν πραγμάτων* : Qui sont les Preuues les plus claires & les plus preignantes & pressantes. Lesquelles on compare excellemment aux estoilles, qui sont faictes de la substance du Ciel mesme, & en sont les parties plus expressees & plus ramassées, qui esclairent dedans le Ciel.

Le Pere du demandeur l'auoit destiné à l'Eglise, ses autres freres estans au seruice du Roy, & en charges assez importantes selon leur naissance & leur condition, estans d'une tres-noble & ancienne famille. Il auoit pour se maintenir dedans l'Estat Ecclesiastique le Prieuré dont est question, duquel il pouuoit s'entretenir, & dont il retiendroit mille ou douze cens escus par an. Croira-t-on qu'il se soit despoüillé volontairement de ce benefice, pour vne pension de six cens liures, & vn Prieuré de nulle valeur, duquel il n'a rien receu iusques à present? Ce seroit l'eschange de Glaucus & Diomedes *χρύσιον χαλκῆσαν*. Il auoit changé son or à du cuiure. La seule qualité de la Recompense d'une pêsion modique, & d'un Benefice de nulle valeur, seroit suffisante pour despoüiller cette resignation de toute vraye semblance d'Acte volontaire! Et ne dira-t-on iamais que le demandeur se soit porté à cela de son propre mouuement: Mais qu'il faut necessairement qu'il y eust quelque cause Externe, qui est ce qu'Aristote appelle Force, dont le principe & la cause vient de dehors, & n'est pas en nous ny en nostre pouuoir; Et ce mouuement exterieur n'estoit autre que le pouuoir absolu de Monsieur le Cardinal, *Vis Potentatus*, côme il est dit en la Loy 63. ff. de ritu nuptiarum : ce qui rend tous les autres faicts, avec ceux qui ont quelque commandement suspects de Force & Violence.

Or on sçait combien vne resignation pour estre valable doit estre franche & libre sans Force, Violence, Contrainte, ny necessité. Auparauant mesmes que les resignations fussent receuës & admises, il falloit que celuy qui vouloit se demettre de son Eglise protestast publiquement qu'il la remettoit volontairement. Cela void en cette Demission & renonciation celebre de Theodorus Euesque d'Heraclee dans

où il est dit qu'il apporta sa Demission & son Libelle d'abdication, qu'il auoit escrit luy mesme volontairement & non par contrainte *ὅτι αὐτὸς ἡδιστα καὶ ἀλλὰ ἐκ γούνης* & en certe Epistre Canonique de saint Cyrile d'Alexandrie à Domnus Patriarche d'Antioche, où vn Euesque se plaint qu'on luy auoit

ait quitter son Eglise par force, *παρεπίστωε λιβέλλους οὐ κτ' ἐπὶ τῷ ὄντι οὐ κείαν, ἀλλὰ ἐξ ἀνάγκης καὶ φόβου καὶ ἀπειλῆς ἐπιδουναί φησι.*

Qui est aussi la plainte qu'un Religieux de Clugny, né en Angleterre, fist à Alexandre Roy d'Escoffe, au Liure six de l'Histoire de *scripsit ad me Celsitudo tua quod Abbatiam dimiserim, dimisi quidem, sed quod cum pace tua dicatur illata vi cui contraire nequini & necessario dimisi, quia retinere non potui*: Tant y a qu'une resignation extorquée contre la volonté, n'est point valable. les Chapitres, *Abbas ad audientiam de his que vi metus-ve causa*, le declarent expressement, *si ad terrorem Laicorum, si per metum regis renuntiavit, restitui debet Ecclesia*: voire mesme, dit du Moulin, le Benefice resigné par force, demeure tousiours à celui qui l'a resigné. La resignation contraincte & forcée estant nulle de plain droit, c'est au Chapitre cinq, de *renunciatione*, où l'Eglise ayant dit, *Si per vim & metum renuntiavit valet renunciatio, quia etiam coactus voluit, sed datur actio preatoria quod metus causa*, imo, dit du Moulin, *renuntiatio coacta, est ipso iure nulla, & ita in Gallia vidi praticari per indices seculares, nec resignans opus habet novo titulo & noua possessione*. Et ainsi le Benefice demeure au resignant, l'abdication & l'eiu-ration qu'il en a faite, n'estant point valable: Et le mesme du Moulin sur la regle de *infirmitas*, nombre 93. dit que cette resignation contraincte & forcée, est tellement nulle, que le Benefice vaque tousiours par la mort du resignant, *ita ut ordinarius possit conferre per obitum*. La Glose de la Pragmatique au titre de *electionibus* §. *ad Tollendam*, en dit autant, & qu'encore que la commune opinion soit, que *renuntians Beneficio per vim & metum perdit ius & possessionem Beneficii, & debet repeti Beneficium per actionem quod metus causa*, *alia tamen opinio magis placet quod non teneat renunciatio Beneficii, per metum facta*, & se fonde sur le Chapitre 5. de *renunciatione*, où il est dit, qu'un benefice ayant esté resigné par force, le resignant le peut tousiours vendiquer. Or le droit de vendiquer ne se donnant qu'au Seigneur & propriétaire, il s'ensuit que le resignant demeure tousiours Titulaire de son benefice.

Mais le demandeur est d'autant plus d'emeuré titulaire de son Prieuré, que sa resignation n'a eu aucun effet: La reunion du Prieuré à l'Abbaye, pour laquelle & en faueur de laquelle il auoit expressement resigné, n'ayant point esté executée: si bien que son Droit est demeuré tout entier.

Le Concordat fait avec Monsieur le Cardinal de Richelieu, porte que le demandeur passera procuration, pour consentir que son Prieuré soit reuiny à la Menfe Abbatiale, comme il estoit auparauant la Desunion; & ainsi qu'il y auoit esté vny par la Bulle du Pape Clement sept à Auignon de l'an 1382. qui sont les propres termes: Et la procuration qui a esté passée en suite, contient aussi pour resigner & reuiner le Prieuré entre les mains du Pape, en faueur de la reunion & reincorporation dudit Prieuré à l'Abbaye de Clugny.

Ce Concordat n'a peu attribuer aucun droit à Monsieur le Cardinal audit Benefice, qu'il n'ait esté approuué & omologué par le Pape: il estoit fait sous le bon plaisir de sa Sainteté, & falloit necessairement que le Pape y apportast son consentement & son autorité: Et la procuration pour resigner, passée par le demandeur, n'estant point pure & simple, mais limitée & conditionnée, & faite en faueur de la Reunion, ne l'a peu aussi priuer, ny abdiquer de son Prieuré, qu'elle n'ait esté admise, la condition d'icelle plainement accomplie, & la Reunion actuellement faite.

Or qu'a fait Monsieur de Cardinal pour obtenir l'homologation de son Concordat à Rome? Il a fait entendre au Pape que l'Union de ce Prieuré

auoit esté faite per felicitis recordationis Clementem septimum predecessorem suum, & a dissimulé que ce fust Clement septiesme d'Auignon, qui n'est point recogneu à Rome pour Pape legitime, & duquel les autres ne se disent point Successeurs. L'on suppose donc au Pape que c'estoit Clement septiesme, de la maison de Medicis, frere de Leon X. & qui fut esleu seulement en l'an 1523. lequel auoit fait l'Vnion.

Mais il y a bien plus grande Obiection: Car on suppose au Pape qu'apres cette vnion faite par le Pape Clement VII. d'heureuse memoire, Monsieur le Cardinal de Guise Abbé de Clugny auoit fait la des-vnion de son autorité, & remis ce Prieuré en son premier estat; & se garde on bien de dire que la des-vnion auoit esté faite par autorité du Pape, en vertu de sa signature & d'un rescript delegatoire adressant à Monsieur l'Archeuesque de Paris: Et sur cette fausse enonciation l'on demande au Pape qu'il luy plaise omologuer le Concordat qui auoit esté fait pour la reünion de ce Prieuré à l'Abbaye de Clugny: Et dictam vnionem, annexionem & incorporationem aduersus illius dissolutionem reualidare & reintegrare.

Le Pape ayant accordé ceste reünion, & commis l'ordinaire pour l'excuter, y a apposé vne charge & condition qui est considerable, à sçauoir, pourueu qu'il luy apparaisse que la des-vnion n'eust point esté faicte par l'autorité du Pape: Les termes sôt, *Constito quod predicta dissolutio vnionis, Apostolica auctoritate facta vel confirmata non fuerit*. Le Pape n'ayât pas voulu que mesme apres vne vniõ qui auoit esté legitiment faite, comme on luy auoit exposé, la des vnion s'estant ensuiuite, de son autorité, Ordonnée & Executée en connoissance de cause! l'on peust encore demander vne Reünion. Ce qui eust tesmoigné trop de variation, & vne trop grande inconstance & legereté: *Iuste Prator*, comme dit la Loy, *inconstantiam recusabit*: comme il est dit en la Loy 27. ff. *De procuratoribus*: ce qui est encore moins tolerable aux Ecclesiastiques: *Cum Illusio & Variatio in personis Ecclesiasticis maxime sint vitanda, Clementina 1. de renunciatione*. Et à cause que l'Official de Paris sçauoit ce qui s'estoit passé au fait de cette des-vnion, qui estoit de son temps, & qu'elle auoit esté faite par autorité du Pape, L'on s'est bien gardé de faire executer cette resignation par l'Official, & cette signature est demeurée sans aucune execution.

Or s'il est ainsi que le demandeur n'a resigné son Prieuré qu'en faueur de la reünion, & que sa resignation n'a esté admise qu'au cas que la des-vnion n'ait esté consentie par le Pape, & faite de son autorité: Puis qu'il se trouue que la des-vnion a esté faite par autorité du Pape, le Benefice sans difficulté est toujours demeuré au demandeur. Car celuy qui resigne sous condition n'abdique point son droit que la condition ne soit accomplie. Le Pape mesme ayant adiousté par son Decret: *Et cum decreto quod per presentem gratiam nullum nouum ius dicta creatura*, qui estoit Monsieur le Cardinal, *in dicto Prioratu, vel ad illius quomodolibet adquiratur, nec acquisitum dici vel censi possit, sed antiquum tantummodo conseruetur*. Le Pape donc n'ayant pas voulu qu'il fust acquis autre droit à Monsieur le Cardinal que celuy qu'il auoit auparauant, & n'en ayant aucun, puisquela des-vnion auoit esté legitiment faite, Ordonnée par le Pape, & Executée par l'ordinaire; Que le Benefice auoit esté possédé par quatre titulaires, & que le demandeur en auoit iouy seize années entieres, Il est tout euident que Monsieur le Cardinal n'y pouuoit rien pretendre, en consequence du Concordat & de la resignation du demandeur. C'est ce qu'à dit Maistre Charles du Moulin sur la Reigle: *De publicandis num. 181. si quis resignet vnionis causa or-*

inarius etiam sub hac conditione suspensus admittere potest resignationem, im resignans verus titularius manet quamdiu pender conditio.

Aussi a on impetré ce Benefice comme vaquant, & vn nommé Flacour domestique de Monsieur le Cardinal s'en est fait pouruoit en Cour de Rome, reconnoissant bien que la reünion n'en auoit point esté faite, pour ce qu'un Benefice qui est vny ne vaque point; Et il pretend que ce Benefice a vaqué par la mort de Monsieur le Cardinal, & qu'il ait residé en sa personne. Mais si le Concordat n'a point esté executé, que la resignation du demandeur n'ait eu aucun effet, il est plus iuste, sauf correction, que le Benefice demeure à l'ancien titulaire, que de l'adiuger à vne personne estrange, Et d'autant plus qu'une resignation forcée n'oste point le droit, & que le Benefice demeure tousiours au resignant.

Quant à la restitution des fruits contre Madame la Duchesse d'Aiguillon & les autres heritiers de Monsieur le Cardinal, la demande en est fondée sur ce que Monsieur le Cardinal a esté possesseur de mauuaise foy, ayant ioüy de ce Benefice comme vny à sa manse Abbatiale, quoy que le Pape ne luy eust accordé reünion qu'au cas que la des-vnion n'eust esté faite par son autorité. Et pour cela l'on a supposé au Pape que c'estoit l'Abbé seul qui auoit fait la des-vnion: ce qui n'estoit point veritable. Il n'a donc point eu de titre legitime & Canonique qui luy en ait peu attribuer les fruits; lesquels par consequent ses heritiers doiuent rendre & restituer, aussi l'argent prouenant de la coupe des bois, pour estre employé au proffit dudit Prieuré.

C'est pourquoy le demandeur conclut à ce que faisant droit sur sa complainte, il soit maintenu & gardé en la possession du Prieuré dont est question, deffenses de le troubler ny empescher, Monsieur l'Abbé de Clugny déclaré non receuable en l'appel comme d'abus interietté de la des-vnion, les heritiers de Monsieur le Cardinal condamnés d'en rendre les fruits, & de rapporter le prix de la vente des boys, pour estre employé en fond au proffit dudit Prieuré, & ce faisant permis à eux de disposer du Prieuré de Maintenay qui auoit esté laissé au demandeur, & le nommé Flacourt debouté de sa complainte, & condamné es despens, ensemble ledit sieur Abbé de Clugny & heritiers de Monsieur le Cardinal.

